

四庫全書

集部

欽定四庫全書

文苑英華卷九十一

宋 李昉等 編

人事二

悔賦一首

感舊賦二首

江上愁心賦二首

愁賦一首

悔賦 并序

梁簡文帝

夫機難預知知機者上智智以運已迷已者庸夫故易曰吉凶悔吝生乎動者也又曰悔吝者憂虞之象也傳

云九德不讐愆作事無悔是以鄭國盜多太叔之恨表

衛風義失宣公之刺彰無將詠興壘事書作季文再思

而未可南容三復而不暇余以固陋之資慎履冰一作霜

之誠竊服楚王之對每徵后稷之詩觸類而長乃為賦

曰

默默不怡恍若有遺四壁無寓三階寡趣月露澄曉風

柳悲暮庭鶴雙舞擔烏獨赴岸林宗之中憑南郭之几

玄德之眊聊縈子安之嘯時起靜思悔吝鋪究前史弔

古傷今驚憂嘆圯成敗之蹤得失之理莫不關此令終

由乎謀始棄夸言於之

一作

頓丘重前非於蘧子蹟夫履

疑作覆

車之人

一作威

豈止一途而已至如秦兼四海之尊

握天下之富混一車書鞭笞宇宙胡亥之寄已危萬代  
之祀難構阿衡失責成之所趙高秉棟梁之授拒諫逞  
刑戮宰誅守矜上林之戲馬嘉長楊之射獸囁咄禁中  
之言欺侮山東之寇及其祠崇涇水作壘夷宮徒希與  
妻子伍下願與黔首同信殫絕於凶醜何前謀之不工

至如下相項籍才氣過人拔山靡類扛鼎絕倫聲駕盛漢  
勢壓餘秦鉅鹿有動天之卒轅門有屈膝之賓既刊有  
功之印亦疑竒計之臣唱雞鳴於垓下泣悲歌於美人  
抱烏江之獨媿分漢騎之餘身郭君失位徒馭而亡尚  
悲殘糗獨飲餘漿枕畚空卧伏軾懷傷魂飄原野骨餌  
豺狼楚王刻鶴播徙南地鏡管徒鳴才人空置豈輜車  
之足榮匪射獵之娛意幽泉斯即白日何冀甯喜納君  
恃功肆寵衛侯厭黷忠臣憤勇昏迷靡悟敗不旋踵商

君被執李斯赴收身居

一作拘

闕下命厄秦囚追傷用法

之弊還思不諫之尤亦何解於今酷終無追於昔謀伯

卓跋扈豺目為輔弒君鳩子誅李害杜鬻恩販寵怨庶

虐人蔽朝政之聰察害上書之烈臣榮暱子於阿尹肆

貪濁之淫威樹姦黨於宮禁察人主之纖微卒其膏鈇

潤鉞寘繆逢微壯武英逸才為時出陸離儒雅照爛文

筆江東啟吞併之籌幽州著懷遠之術運鍾毀冕時屬

傾顛鏑鳴水濶日黑山遷留下

一作劉卞見張華傳

之謀不決忠

良之戮已纏台耀之災雖啟鷓鷯之賦徒然士衡文傑

綽有餘裕氣含珠璧情蘊雲霧志闕沉隱心耽進趣倔

一作

茲猛衆臨此勁兵抗言孟玖

見陸機傳

肆此孤貞牋辭

已切墨慢徒榮

疑作榮用陸機黑憶繞車事

形殞河上心憶華亭若

夫楊惲狂言灌夫失志卒其殞命埋軀傷形屬吏周君

飲後裴子酣狂靳固紀瞻之妾眠卧季倫之房亦足以

魂驚神爽悔結嫌彰已矣哉波瀾動兮昧前期庸夫蔽

兮多自欺不遠而復幸無嗤建功立德有常基冒馳臆

斷多失之前言往行可為師

感舊賦

并序

唐太宗

余將問罪東夷言過洛邑聊因暇景散慮郊畿流眄城  
闕之間覩弱齡遊觀之所風雲如故卉木惟新少壯不  
留忽焉白首追思曩日緬成異世感時懷舊撫轡忘歸  
握管叙情賦之云爾

惟端辰

一作辰

之餘隙屬凝陰於暮年時觀兵於九伐聊

息駕於三川登臨原隰悵望郊壘覽綺紈之遊踐觀疇



昔而依然地不改其城闕時無異其風煙想飛蓋於河  
曲思解珮於芝田挾彈銅駝之右連鑣金谷之前薪指

倏其代謝舟壑俄而貿遷屬隋

漢東大國通鑑初書楊忠為隨公楊堅隨王文

帝方省為隋

季之分崩遇中原之喪亂濯龍變為汙池平樂

化為京觀天地兮厭黷人神兮憤惋遂收袂而電舉乃

奮衣而雲翔據三秦兮鳳跣出九谷兮龍驤揮寶劍之

虹彩

一作影

迴彫戈於日光掃橈槍兮定六合廓氛沍兮

靜八荒昔摠戎於藩屏今恭已於巖廊營餘故柳壘有

殘牆懷壯齡之慷慨撫虛躬而自傷觀世俗之飄忽鑒  
存亡於宇宙林何春而不花花非故年之秀水何日而  
不波波非昔年之溜豈獨人之易新故在物而難舊歲  
月運兮寒復暑日月流兮夜還晝信造化之常經孰聖  
賢之可救於是停輿郊郭極眺山川信茲都之壯麗乃  
卜宅於姬年興亡兮代襲隆替兮相沿惟在德而為故  
實棄道而難全仰煙霞兮思子晉俯浩汗兮想張騫歎  
高蹤之美一作靡覲嘉令譽之空傳聊憑軾而靜慮懷古

人而悵焉况復氣結隆冬歲窮餘律對落景之蒼茫聽  
寒風之蕭瑟雲散葉而無蒂雪凝花而不實霧嶺斷兮  
疑連煙林疎兮似密節物同於前載歡憂殊於曩日扣  
沉思而多端寄翰墨而何述

第二 并序

岑 參

參相門子五歲讀書九歲屬文十五隱於嵩陽二十獻  
書闕下嘗自謂曰雲霄坐致青紫俯拾金盡裘弊蹇而  
無成豈命之過歟國家六葉吾門三相矣江陵公為中

書令輔太宗鄧國公為文昌右相輔高宗汝南公為侍  
中輔睿宗相承寵光繼出輔弼易曰物不可以終泰故  
受之以否逮乎武后臨朝鄧國公由是得罪先天中汝  
南公又得罪朱輪翠一作華轂如夢中矣今王道休明噫  
世葉一作業淪替猶欽若前德將施於後人參年三十未  
及一命昔一何榮矣今一何悴矣直念昔者為賦云其

詞曰

吾門之先世克其昌赫矣烈祖輔于周王啟封受楚佐

命克商二千餘載六十餘代繼厥美而有光其後闢土  
宇於荆門樹桑梓於棘陽吞楚山之神秀與漢水之靈  
長猗盛德之不隕諒嘉聲而允臧慶延自遠祐洽無疆

自天命我唐始滅暴隋挺生江陵傑出輔時

一作持

為國

之翰斯文在茲一入麟閣三遷鳳池調元氣以無忒理  
蒼生而不虧典絲言而作則闡綿蕤以成規革亡國之  
前政贊聖代之新軌捧堯日以雲從扇舜風而草靡洋  
洋乎令聞不已繼生鄧公世實湏才盡忠致君極武登

台朱門復啟相府重開川換新楫義傳舊梅何糾纏以  
相軋惡高門之禍來當其武后臨朝姦臣竊命百川沸  
騰四國無政昊天降其荐瘡靡風發於時令藉小人之  
榮寵墮賢良於檻穽苟愔愔以相蒙胡醜厲以職競既  
破我室又壞我門上帝愔愔莫知我冤衆人愔愔烏外切思  
會也不為我言泣賈誼於長沙痛屈平於湘沅夫物極  
悶也則變感而遂通於是日光迴照於覆盆之下陽氣復暖  
於寒谷之中上天悔禍贊我伯父為邦之傑為國之輔

又治陰陽更作霖雨伊廊廟之故事皆祖父之舊矩朱  
門不改畫戟重新暮出黃閣朝趨紫宸繡轂照路玉珂  
驚塵列親戚以高會沸歌鐘於上春無小無大皆為緡  
紳顯顯叩叩踰數十人嗟乎一心弼諧多樹綱紀羣小  
見醜獨醒積毀鑠於衆口病於十指由是我汝南公復  
得罪於天子當是時也偪側崩波蒼黃反覆去鄉離土  
隳宗破族雲雨流離江山放逐愁見蒼梧之雲泣盡湘  
潭之竹或投於黑齒之野或竄於文身之俗嗚呼天不

可問莫知其由何先榮而後悴曷曩樂而今憂盡世業  
之陵替念平昔之淹留嗟予生之不造常恐墮其嘉猷  
志學集其荼蓼弱冠干于王侯荷仁兄之教導方勵已  
以增修無負郭之數畝有嵩陽之一丘幸逢時主之好  
文不學滄浪之垂釣我從東山獻書西周出入二郡蹉  
跎十秋多遭脫輻累遇焚舟雪凍穿屨塵緇弊裘嗟世  
路之其阻恐歲月之不留睠城闕以懷歸將欲返雲林  
之舊游遂撫劔而歌曰東海之水化為田北溟之魚飛



上天城有時而復陵有時而遷理固常矣人亦其然  
觀夫陌上豪貴當年高位歌鐘沸天鞍馬照地積黃金  
以自滿矜青雲之坐致高館招其賓朋重門疊其  
車騎及其高臺傾曲池平雀羅空悲其處所門客肯  
念其平生已矣夫世路崎嶇孰為後圖豈無疇日之  
光榮何今人之棄予彼乘軒而不恤爾後曾不愛我  
之羈孤歎君門兮何深顧盛時而向隅攬蕙草以惆  
悵步衡門而踟躕強學以待知音不無思達人之惠顧

庶有望於亨衢

江上愁心賦贈趙侍郎

張說

江上之峻山兮鬱崎峨而不極雲為峯兮煙為色歛變

態兮心不識江上之深林兮杳冥濛而不已鷲一作鳥為

花兮猿為子紛盪漾兮情一作言莫擬夏雲峻一作陰兮若

山秋水平兮若天冬冰澌兮一作冬沙飛兮浙浙春草靡兮芊

芊一作節非感四時之默運知萬化之潛遷伴衆鳥兮寒渚

望孤帆兮日邊雖欲貫愁腸於巧筆紡離恨一作夢於哀

絃是心也非模放之所逮將有言兮是然一有將無言兮是然六字

謝燕公江上愁心賦

趙冬曦

江上之仙鶴兮鳳翥而龍躍氣摩青天兮遙橫碧落集  
洞庭兮乍駐倏迴翔兮寥廓江上之鳴鴈兮違陰以就  
陽中霄翻翰兮上帶青霜雖主人兮感會蹇淹留兮瀟  
湘湘水兮深深荆山兮岑岑荆有玉兮玉為音湘有芷  
兮芷為心我所思兮惜惜不得見兮霑襟搦芳札兮援  
寶瑟申短音疑作短章兮吐長吟草萋萋兮自綠目征帆兮

春水曲水一望兮空躑躅望眇眇兮思綿綿憶都門兮  
夏雲邊邈千里兮無由緣送涼風兮脫葉復窮陰兮冒  
天緬一日其如歲矧四運之相遷離別也騷愁焉惡乎  
然惡乎不然

愁賦

符載

愁之為物也親賤貧傲富貴無賢知兮不肖事違衷而  
必至非玄黃之色殊甘辛之味其去也若緣雲之難其  
來也類走丸之易愁兮愁志士蹇以徘徊鬱風雲之氣

挺棟梁之材思宏廓以經濟刻洪勳於鼎鼐命路猶隘  
天衢未開滄波悠悠以東注白日忽忽其西頽玄德拊  
髀以泣下孔明抱膝而思來愁兮愁靜女悵其誰語聳  
端操而不爽抱明心以自處當泮水之良辰期鳴鴈之  
得侶桃李艷於淑景蕙蘭生於幽渚望蹇修兮不來念  
良人兮何許愁兮愁邊塞兮行役始忘家而徇國忽時  
淹而歲積金河流而更遙銅柱去而太劇凝雲披嶺驚  
沙滿磧馬向北以嘶風人上隴而吹笛功名慨其緬邈

鬢髮颯以斑白伏波據鞍而骨驚定遠操戈而涕激愁  
兮愁禁掖兮恩光爭修曼態競飾明璫動千金之巧笑  
希一顧於君王嬌妬盈於思慮移奪起於毫芒何長門  
之咫尺邈阻絕乎陵岡宮殿深兮月皎歌吹清兮夜長  
班姬無言以掩扇陳后迴裾而就床愁兮愁春與秋兮  
登臨放臣寓目遊子開襟楓江千里青壁萬尋微波蕩  
漾灌木蕭森香一作雜花而覆水見槁葉之亂林起宋  
玉之沉思傷屈平之遠心愁兮愁往事紛其斷續申生

被譖周勃受辱樂毅無階以轉燕黃權何計而歸蜀投  
令君於虛器疑卞和之美玉李廣失路於匈奴徐市泛  
舟於海曲過山陽而日晚望西陵而樹綠包胥感激於  
秦庭鄒陽畏偏於梁獄愁兮愁羈志杳而無伴鴻漸于  
陸層霄未半懷戴君與利物每行吟而坐歎安得百斛  
之醇醪使斯愁也霞開而霧散者哉

文苑英華卷九十一

欽定四庫全書

文苑英華卷九十二

宋 李昉等 編

人事三

思慎賦一首

韋弦賦一首

京兆試慎所好賦一首 三復白圭賦一首

駟不及舌賦二首

思慎賦 并序

劉知幾

國史云知幾著思慎賦以刺時且以見志鳳閣侍郎



蘇味道李嶠見之相顧而歎曰陸機豪士所不及也  
當今防身要道盡在此矣

賦形天地

一作且夫  
肖形天地

受氣陰陽生樂死哀進榮退辱

此人倫之大分也然歷觀自古以迄于今其有才位  
見稱功名取貴非命者衆克全者寡大則覆宗絕祀  
埋沒無遺小則繫獄下室僅而獲免速者敗不旋踵  
寬者憂在子孫至若保令名以沒齒傳貽厥於後裔  
求之歷代得十一於千百某嘗迹其行事畧而論之

至如望夷篡奪鴻溝戰爭包燕蓋之異志踐恭顯之  
邪迹或干紀亂常或窺窬僥倖此而獲罪固其宜也  
爭二城而相殺期五鼎以就烹獻魚炙以交鉞舞鷄  
鳴而伏鎖或幸災樂禍或甘死徇生求而得之又何  
怨也降茲以外有異於是莫不重七尺於太山恡一  
毛於尺璧徒惡其死而不知救死之有方但惜其生  
而未識衛生之有術何者地居流俗之境身當名利  
之路皆物之相物我之自我當仁不讓思倍萬以孤

標唯利是視顧半千而秀出行高於人衆必非之官  
大於國主必惡之而名譽娛其耳光榮炫其目口甘  
腴拳啗鈎吻之腐腸身安棟宇誠垂堂之折足自謂  
長無六疾永固百齡歸然可與金石齊堅松喬比壽  
者矣殊不知闕張以傲誕為將桑霍以滿盈居職晁  
錯削國以獻忠伯宗匡朝而好直處父則純剛立性  
張溫則太明為識見之者為之寒心聞之者為之變  
色亦猶卧於積薪之上而不知火之將燃巢於折莒之

未而不悟風之已至既而惡稔釁盈道窮數極黃沙在  
繫懷上蔡而無追白刃臨頸揮廣陵而長歎猶以為禍  
出不虞災非素漸以茲自卜奚其謬歟假有舉一反三  
粗分菽麥知豐屋之不誠悟覆車之足尤而皆宴安鴆  
毒遲疑猶豫交戰未勝而禍機先發不杜之於欲萌方  
悔之於既兆用使茂先將戮顧諍子而多慙安仁已收  
負慈親而永訣嗚呼自古所以多殺身亡族者職由於  
此也因斯而言則知禍福無門唯人自召自貽伊戚匪

降于天而謂之不幸未之聞也昔夫子有云仁遠乎哉  
我欲仁斯仁至矣竊以仁為百行之首大聖其猶病諸  
然必以中才之人企勉而行猶或可及况其慎者蓋不  
過慎言語節飲食知止足避嫌疑若斯而已矣非有朝  
聞夕死去食存信之難也違之則為凶人蹈之則成吉  
士其為弘益多矣而世人罕能修身二字一作日盱使厲已自  
求多福方更越禮過度坐致覆亡此宣尼所以譏鮑莊  
子之智一作志不如葵而孫叔敖譬言以螳螂伺蟬不知黃

崔在後余早遊墳素晚仕流俗觀古今之人物極矣見  
吉凶之成敗衆矣夫貴不如賤動不如靜嘗聞其語而  
未信其事及身更之方覺斯言之徵矣加以守愚養拙  
怯進勇退每思才輕任重之誠智小謀大之憂觀止足  
於居常絕覬覦於不次是以度身而衣量腹而食進受  
代耕之祿退居負郭之田庶幾全父母之髮膚保先人  
之丘墓一生之願於斯足矣但才非上智習以性成猶  
恐觀芳餌而貪生處鮑肆而神化苟或靜退之心日弛

則馳競之慾日增顛沛以之嗟何及矣常思列銘几杖  
取配韋弦刻心骨而不忘傳諷誦而無斃蓋語曰明鏡  
可以覽形徃古可以知今是用尋徃哲之事驗古人之  
得失寄彼形言存諸炯誠列之座右題其賦云

吾嘗終日不食三省吾身覺昨非而今是庶捨舊而謀  
新原夫天地之大德曰生聖人之大寶曰位生也者賢  
愚定其美惡位也者朝市總其名利七情由其不等百  
行以之咸異儻無心以自謀良局途其必躓何者得不

思失雄獨忘雌耽人爵以健美窮代路之險熾是則平  
衡而登九折直轡而踐三危干戈生於肘腋胡越起於  
藩籬假使履獸尾而不啞探龍頷以獲竒省僥倖以適  
願非仁者之所為也借如幽室鑿坯窮居負郭二頃樵  
採一廛耕獲困沉名於抱關志充詘於懸箔俄拔跡於  
羊豕倏搏飛於燕雀金紫照其陸離銀黃煥其沃若彼  
滿盈之難守伊榮茂之易落朝結駟而乘軒暮齒劒而  
膏鏃方思上蔡之犬追念華亭之鶴奚一身而足怪迺



九族其惟索爾其寂莫

疑作冥

無事殷憂不平耻當年而

功不立疾沒世而名不成懷書訪道學古言兵擅雲間之美譽馳日下之休聲夫鐸穴由於足響膏爍起於多

明趙國從而蘇裂齊城下而酈烹吹律誅

一作殊謂京房

於西

漢獻寶削於南荆遂懷沙於楚塞因說難於秦庭李仕登朝而就戮嵇道超代而逢刑苟才智之為患雖語嘿而同傾若乃猛將出師謀臣獻策鱗翼攀附風雲感激開黃閣與朱門樹高幡及長戟恃龍蛇之恩舊望烏兔

之盡獲思擅寵於邦家誓傳名於竹帛蜀既平而艾檻  
吳已霸而胥溺黜淮陰以斃韓遷杜郵而死白彼功成  
而不退俄寵謝而招隙何追憶於布衣翻興思於下澤各  
入門而自媚徒吊問其何益亦有爵非才舉榮因寵遷  
吮癰求愛舐痔逢憐朝承恩而袖斷夜託夢而衣穿唾  
弦直之死道喜邪徑之敗田氣噓霜而吸露力轉日而  
迴天自謂方江湖而共永比嵩岱而齊堅一朝失據萬  
古淒然至於申侯逼迫而辭楚盧綰披猖以去燕彼丁

傳之崇貴將梅茹之威權疇一姓其或在覆五宗而不  
全次有跡鄙衡門情娛俠窟出入田竇徃來平勃歌無  
魚以自謀獻文蛇而請謁疑卧薪之可久謂巢葦之恒  
安烈火灼其潜燎衡風歛其上搏曹門傾而天鄧賈室  
壞而夷潘班坐刑於黨竇殷取戮於臣桓顧噬臍而不  
及知觸藩一作拾之為難夫化赤漸乎鄰丹為黔資於邇  
墨生於麻者既革其操染於藍者亦變其色交非鮑叔  
遊異田蘇忘臭肆之不惡持甘醴以為娛餘推誠而裨

一作  
狎

耳蕭結契而連朱始刎頸以交約終反噬而相屠

王綢繆於魏諷石嫌疑一作  
慊疑於州吁孫秀與趙倫齊貫

石顯將牢梁並驅汙無禮以自及蹈不義而同誅別有

直若史魚正如伯厚飾智驚物露才不偶持瑾瑜而指

瑕鑿水鏡而求垢彼獨潔之為雅固羣醉之所醜况乃

誹謗朝廷攢斥朋友方縉紳以豚犢延冠蓋以雞狗符

結怨於晉台彭肆言於蜀后禰悲號於座上庾嘲謔於

行後揆榮辱之在身猶樞機之發口儻一言其靡慎奚

四大之能守然則禮無微而不驚

疑作警

怨無小而無讎

察關張之同敗審韋弦之所由豈直君子不可罔而小人獨可仇侷英跼藏遠邁覩廝隸其如萍觀輿臺其若芥本無猜於螻蟻寧有忌於蜂蠆安知鷲兔輟授七尺由其喪亡羊羹匪均三軍以之覆敗苟有怨其必復諒無所而不誠於是考茲出處稽彼行藏咸知進而不知退知存而不知亡惑多言之必敗迷暴貴之不祥彼有足而罕衛行立身而靡防猶乘車之去軌若涉海

之無航既百慮而一致故異術而同喪唯夫明達高人  
賢良志士知滿損而謙益驗弱生而強死無為福先無  
為禍始節其飲食謹其容止聚而能散為而不恃潔其  
心而穢其跡濁其表而易其裏範閤室而整冠循覆車  
而易軌以道德為介胄忠貞為劍履愛髮膚而不傷保  
家室以不耻若乃詢木鴈於園吏訪光塵於柱史萬石  
守慎以全榮二疏既滿而辭仕表不及於憎愛柳忘情  
於愠喜漢先主之立誠莫尚中庸衛大夫之所羞獨為

君子余雖不佞嘗從事於斯矣重曰夫含靈稟質異品  
殊倫生何如而弗貴命何如而弗珍鴈含枚一作枝以避  
繳狐聽水而涉津葵傾心以衛足櫟不材而謝斤彼草  
樹之無識唯禽獸之不仁猶稱能以遠害尚假智以全  
真矧百行之君子迺三才之令人何自輕於養性何自  
忽於周身儻狂歌之可採伊輿誦之可詢敢刊銘以勒  
座遂援翰而書紳

韋弦賦

以君子佩之用  
規性情為韻

趙魏君子跡著明文有韋弦之淑慎在躁靜以區分于  
以誠德在我于以表正事君稟剛以宣其志守柔以播  
其勲一作薰動靜有恒得樞機於要道佩服無斁合規矩  
於典墳昔董安于事趙簡子虛心固節收目反視由一  
國之具瞻在四德之為美誠孜孜於不怠諒勤勤於所  
履觀其弦之勁姿可以勵其攸止式標其道於焉克已  
所謂惕禍以垂休故以善終而令始且其天道何常順  
之無悔察是非之倚伏節行藏於進退守而取則在剛



柔以為箴動必可觀比玉劍之為佩鄴令乃曰躁用乖於正性故安卑以從時靜既恭於五德故不暴以為師命韋帶之間緩體君子之舒遲惟器可象惟賢則之佩蘭則殊於楚客象環有慕於宣尼信建物之表意實善人之所資故知欲不可縱儉以足用德或可移中以成規識君子之容止見淑人之表儀周旋之中寧假於宮徵內外相制亦合乎損筮大哉景行剛柔異性緩之於韋用和急之於弦表正既守道而恒佩因履端而不競

懿夫式彰茂德分章

一作意

表情禮節既備敬慎孔明參

衣冠而振

一作振

序列簪紱以齊榮猗二子之垂誠與千

古之揚名

京兆試慎所好賦

以重譯獻珍信非寶也為韻

君子嚴其牆仞戒以心冒知耽味之易入俾回邪而不  
容其慎德也白圭是聞其三復其好賢也緇衣必薦其  
九重自然契已坦蕩清心肅雍翫喪志而何有欲敗度  
兮何從昔如王者三朝遠人重譯執贄山委獻琛雲積

豈不知納寶庫為子孫之藏映玉墀嘉戎夷之績蓋以  
難得之貨有損不貪之寶無斃獲狼而荒服不臻却馬  
而漢王受益嗤虞公受

一作變

玉之敗美晉帝焚裘之迹

匪騁欲而適願將去奢而無怨滿堂足戒黃金寧慎其  
四知連城不求白璧何勞於三獻所愛者禮所懷者仁  
君由之而又國士用之以防身衣服有常非敢翫於千  
襲飲食不瀆

一作海禮記其飲食不瀆

寧專美於八珍其受

一作愛

才

也必擇能而得雋其慕友也亦資忠而履信將辭直而

不違知言甘而有吝是窒其欲無忽於微五色足耽審  
之則朱紫不奪八音可樂慢之則鄭雅同歸思禁邪而  
制放慮今是而昨非上則宣風下同一作偃草將還淳  
而復朴在耽德而味道蒐田失度則念虞人之箴慈儉  
或虧必思老氏之寶至矣哉好之者儒以多聞為潤屋  
立義為分社孝既慕於參乎學願從於回也孜孜屑屑  
束修問寡如此人所以銘座而弗忘書紳而不捨

三復白圭賦

以立身慎言思  
是用則為韻

張仲素

賢哉南容詠白圭於雅什奉明義以為誠徵莠辭於口  
給諒同符於素履將辨志而貞立玷生在玉伊良工之  
可磨言出於躬縱駟馬之不及是知詩之為喻言以昭

信想研精於輿旨

知祇疑作底

滯於遺韻詠難

疑作歎

彰其

不足反覆明乎克慎身之是省况開卷而念茲心苟無  
瑕異獻璞之往吝允矣君子宜其念茲懲諸嘉玉觀爾  
靈龜尚鮮華之彩慕特達之詞知在涅而不昧同居暗  
以無欺重明哲以作則故沉吟於四時

疑作詩

既切磋以

求友將造次而解頤得之自中殊學者之四失復而無

數類夫子之繹思

一作類文  
子之三思

是謨是訓

一作尋  
之繹之

是效是

則諒修己以為物可自家而刑國既引之以改過復重  
之以比德香芸自雜於卷舒青蠅寧間乎白黑彼以圭  
為瑞此以誠為珍苟因文而假物非貴玉而賤珉然則  
懷璧者耻慢藏而成玷事君者畏不密而失身夫其列  
於雅頌備法語之為用垂于後昆庶厥道之長存汗簡  
之文可考絕編之義再敦且非守句之末學有異斷章

而賦言豈不以賢智之心慎樞機之所啟瑾瑜之質懼  
毫髮以成痕懿夫志士仁人明不自是執一善以無失  
故三復而樂只若或志於斯行秉善價而誰毀

駟不及舌賦

以是故先聖予  
欲無言為韻

陳忠師

甚哉言之出口也電激風趨過乎馳驅掉三寸以發越  
應千里於須臾逝不可追空勞於駟馬行而無蹤豈繫  
於九衢故君子念彼尤悔本乎虛無苟出話之不復將  
起羞而是虞且舌之鼓也有時而馳騫類扣虛之莫獲

同捕影之難遇蕭蕭之響徒繫於下風逐逐之音已疲  
於中路信樞機之爰發隨小大而作故儻善守於輔車  
何遽煩乎騏驎遲速相懸奔走徒然言出於身所謂往  
而不反馬竭其力猶歎瞻之在前雖欲適遠邇課後先  
如流之巧以失若滅之態何宣嗟夫以駸駸之足追言  
言之速豈能之而不欲蓋窒喋喋之喧喻駿駿之奔在  
誠之而不言肇自微眇倏爾騰翻疾既甚於過隙患必  
防於屬垣斯事也罔念則狂克念則聖悞片言之既往



知逸足之難競自然有躄之造勿謂載翁其居此不矜  
於哿矣彼何患於班如不然者其出彌遠其來愈一作適

疎是以慕宿諾於李路悔聽言於宰予至哉詩惡翩翩  
書懲靡靡方憑響於無際豈絕塵之可弭易象又著夫  
寡詞禮經亦防其苟訾未若古人之深誠體於是兮粥  
於是

第二

以樞機一發榮辱之本為韻


陳仲卿

言如流兮唯舌是出咎將至今徒駟之疾既力竭而罔

逮則厲階而非一孰云不進諒金鑠以難追尚謂莫捫  
苟星奔而愈失由是知所大者吾將誠之雖欲加於鞭  
策誠有謬於毫釐不且息焉想喋喋而自遠非敢後也  
因駸駸而罔追爾其逝矣將興班如忽越彼懸蹄之莫  
馳伊利口之斯發猶在耳而旋失須臾若過隙而終煩  
滅沒澹澹如掉俄出有而入無薄薄陟遐想勞筋而苦  
節豈獨囂然未殄倏爾既徂微其如駕之捷防其不密  
之樞如沸如騰訝以疑作成於枝葉靡瞻靡顧信空騁

於道途原夫貴以寡尤取之不辱慮一出而匪賤故再  
驅而是勗苟如簧之靡定是見瘁躬若捕影之無由寧  
勞蹠足是知聽之則咎鼓之或非靡不忘於可復固必  
在於知機雖齊景之則多爰思滅迹儻張儀之尚在詎  
可塞違至哉立彼教言先乎根本弘影響之靡誠懼衆  
多之招損崩騰未蹠倂逐日而自勤反覆雖柔見如電  
之將遠是知孔甘者辱若訥者榮期自虞於速禍故必  
遣於遄征君子所以存勸誠立度程雖奔走而致遠吾

知夫莫疾於聲



文苑英華卷九十二

欽定四庫全書

集部

文苑英華卷九十三至  
六

詳校官內閣學士臣瑞保

助教臣常循覆勘

總校官進士臣朱鈐

校對官中書臣葉蘭

謄錄監生臣王廷璧

欽定四庫全書

文苑英華卷九十三

宋 李昉等 編

人事四

妄心賦一首

愛而不見賦一首

謫九年賦一首

性習相近遠賦二首

知止賦一首

知四十九年非賦二首

謙賦一首

謙受益賦二首

妄心賦

賈峴

始吾有形與憂俱生形是幻器憂為妄情愛業潛結貪  
心日萌如狂犬之逐塊似飛蛾之赴明舉世役役終身  
無成慨愚者之未達嗟此志之難遏多賤實而貴名咸  
棄本而逐末利之所在蹈水火而非懼勢之所存棄仁  
義而如脫方自以為氣足自負殊不知患其可掇夫生  
也有涯而智之無已鵬鷗未足適其分儒墨焉能齊其  
理世謂之憂我適足以為喜世之所譽我適足以為毀  
自我心而視物四者未知其孰是借如青樓上路紅粉



佳人編貝為齒點朱為唇朗如明月之初霽芳若綠條  
之在春流曼臉而光射動鳴環而態新此必天下之巨  
艷固當衆族而咸親奚為乎鳥見之望層雲而自逸魚  
見之入深泉而不出彼醜好之非我吾孰知其所失若  
乃樂府窮選伶人擅名跳丸劍之揮霍奏金石之鏗錡  
復燕趙之稱最信音容之莫京清歌一轉而行雲過長  
袖屢舞而流風并實天下之樂事當觸類而含情奚為  
乎爰居卒天於鐘鼓聾俗不知其韶武嗟愛憎之在物

吾孰知其所主嘗以為生者物之可欽死者人之可畏  
方其鬪體之自得也不異夫南面之至貴謂死之為是  
生之為非何存沒之交戰而彼我之相違嗟乎求馬于  
肆馬不可以得以猿為心猿亦未之息夫制動者以靜  
吾當反照於玄極

愛而不見賦

丙辰歲待詔京邑貽舊知作

蕭頴士

嗟乎或愛之而不見者有之一無矣何必周秦異代夷

之字

夏殊軌阻嚴城之九重限方舟之一水苟時事之多怨

故人遐而室邇關山起於足下堂上遠乎千里聳專專

之目成遽將

一作時

逝而復止詩人所以思婉孌而搔首

賦城隅之有俟吁不得其已也惟夙昔之良會夢佳期

於北方叙渤海

一作疑渤海

之三山吸流霞之景光含芳詞

以况予云惠好之不忘願報

一作願服

義於永日陪遊宴

一作

嬉

於帝鄉廣莫忽而號

二字一作其飄

怒鯨波洶而騰張俄驚

魂以輟寐問

一作問

窮髮之茫茫將揭厲以復從駭

一作駭

風濤之匪量思

一作顧

投軀以靡吝撫遺體以兢惶晨切

切以悽悽

一作悽愴

夕屏營以彷徨追前歡之俯邇歎此恨

之攸

一作悠

長於是收神返慮澄澹靜默冥然就寢兀若

無識冀良宵之復遇希舊遊之可即徒有賴

一作願

兮且

未克憂深沉

一作沉深

兮萃胸臆風兮雨兮思君子兮何極

謫九年賦

劉禹錫

古稱思婦已歷九秋未必有是舉為深愁莫高者天莫

濬者泉推以極數無喻九年伊我之謫至於數極長沙

之悲三陪

一作倍

其時廷尉不調行當跂而天有寒暑閔

餘三變朝有考績明幽三見顧堯之民一作明兮亦昏墊

而有歎歎息兮徜徉登高高兮望蒼蒼突弁之夫我來

始黃合抱之木我來猶芒山增昔容水改故坊童者鬱

鬱兮涸者洋洋天覆地生翁兮無傷彼族而居鄉之投

荒彼軒而遊昨日析楊信及澤濡俄然一作病復常稽天

道與人紀咸一債而一起去無久而不還禁無久而不

理何吾道之一窮兮貫九年而猶爾噫不可得而知庸

詎得而悲苟變化之莫及乎一作兮又安用夫肖天地之

形為

性習相近遠賦

以君子之所  
慎焉為韻

白居易

噫下自人上達君咸德以慎立而性由習分習則生常  
將俾夫善惡區別慎之在始必辨乎是非糾紛原夫性  
相近者豈不以有教無類其歸於一揆習相遠者豈不  
以殊途異致乃差於千里昏明波注導為愚智之原邪  
正岐分開成理亂之軌安得不稽其本謀其始觀所由  
察所以考成敗而取捨審臧否而行止俾流遁者返迷

途於騷人積習者遵要道於君子且夫德莫德於老氏  
乃曰道是從矣聖莫聖於宣尼亦曰非生知之則知德  
在脩身將見素而抱朴聖由志學必切問而近思在乎  
積藝業於黍累慎言行於毫釐故得其門志彌篤兮性  
彌近矣由其徑習愈精而一作道愈遠而其旨可顯其  
義可舉勿謂習之近徇迹而相背重阻勿謂性之遠反  
真而相去幾許亦猶一源派別隨渾一作澄而或濁或  
清一氣脉分任吹煦而為寒為暑是以君子稽古於時

習之初辨惑於成性之所然則性者中之和習者外之  
徇中和思於馴致外徇誠於妄進非所習而習則性傷  
得所習而習則性順故聖與狂由乎念與罔念福與禍  
在乎慎與不慎慎之義莫匪乎率道為本見善則一作  
遷觀炯誠於既往審進退於未然故得之則至性大同  
若水濟水也失之則衆心不等猶面如面焉誠哉習性  
之說吾將以為教先

第二

同前韻

鄭 俞



酌人心之善敗惟性習之所分習者物之遷以動為主  
性者生之質以靜為君運情有同於鎔鑄通志亦比夫  
耕耘或定心以純一或逐境而糾紛故定心者若䟽源  
而自得逐境者猶理絲而又棼且物之感人無窮人之  
徇物無已近之則歸於正性遠之則滅於天理雖真妄  
之多端諒御用而由已至若習於所是則孟母之訓子  
其居也初闌闔之是隣遂賈鬻而無耻及夫又徙于學  
徒示以墳史卒能振文行以標名鬱古今而播美豈不

以性相近而習之至矣又若效之而非則壽陵之從師其故也等善行之無轍見大道之甚夷及夫邯鄲之學匍匐於茲既所能之未盡終故步而莫追豈不以習相遠而性亦失之固宜人定其情物安其所苟欲遷性習以交喪易賢愚之攸處則捨於已而效於人學彌得而性彌阻迷而莫息亦莫之禦是非乖理而亦徇未若襲慎而委順勿牽外以槩名在執中而克慎欽若與旨聞諸古先習之則善道可進守之則至理自全茲義也智

所不染愚亦難遷儻中庸之可甄願斯焉而取焉

知止賦

并序

李德裕

古之稱山林之士往而不能返朝廷之士入而不能出  
先哲所以趣舍異懷隱顯殊迹蓋兼之者鮮矣今余自  
春秋至西漢取卿士

一作取其卿

大夫進能知止退不失正  
者綴為此賦云

觀春秋與漢策求知止之大夫魯莫高於柳惠衛莫貴  
於甯俞吳乃得於延州楚乃尚於菟雖至聖無軌超

然不拘猶歎行藏而

一作以

與顏稱卷懷

一作舒

而善遂則

由聖門而進退者得

一作豈

不勇於知止乎佐

一作左

漢留

侯與道為徒厭華屋而不處思赤松以遊娛清則兩龔

美則二疏父子欣以相顧衰老至而歸歟祁祁青衿戴

負經書藹藹玄冕祖我城隅歎冥鴻之不反

一作及

皆雪

涕以漣如嗟余生之疲病念寄世之湏臾曾陟

一作涉

險

而知懼痛摧輪之不虞諒難復於玷缺

韋玄成作詩自若復玷缺之艱

難且覃思於玄虛聊揮金於餘日乃迴駕於迷途况乎

托北阜以為宅

應璩書曰南臨洛水北據印山託崇岫以為宅因茂林以為蔭

就東山

而結廬

左思徙居洛陽城東著經始東山廬詩

仲樂

一作既

得於清曠

仲長統論

曰欲卜居清曠以樂其志

陶豈歎於將蕪其遠眺也則伊水陸渾北

繞皇居度雙闕之蒼翠若天漢之逶迤少室東映於原

隰鳴臯西對於林間其近翫也則檻泉流於一壑嘉木

盈於萬株逕被芳蓀沚映芙蓉聽求友之鳴禽見自樂

之儵魚徙竒樹於台嶺隱翠葉而垂珠得恠石於震澤

聳青岑而韜瑜昔有罷侯種瓜逃相灌蔬竊比君子亦

能荷鋤或引蔓於長坂或導流於清渠放

一作傲

情人世

之外寄跡羲皇之初望夕景於平林眺寒煙於遠

一作故

墟磨廢遠而騰倚鳧鴈去而相呼酌盈樽以

一作而

自慰

賴鳴琴而不孤懷綺皓而披素卷想瀛洲而觀畫圖何

必尚

尚子平也

遍遊於名嶽蠡長往於五湖嗟夫世於知止

之道若存若無李斯忘於稅駕惠子疲於據梧盡生涯

以自若何智力之有餘庶收光之未晚期終老以

一作於

桑榆

知四十九年非賦

以賢者最身知  
非昔歲為韻

陸 肱

往事多違今來覺非嗟忽度於時景懼將萌於禍機新年當艾服之初方能知過往歲比靈著之數未省防微試問何人云蘧伯玉以道為喻因言自勗追向者以何及悟平生之不足處身而每在廉謹立志而常齊寵辱故乃追往日想當年似有失禮疑乎不賢懼愧於三千之內仍思於五十之前雖云時不再來悔無及也所謂過而能改善莫大焉想其悒悒自傷兢兢若厲悲急景

以隙過歎芳時而川逝將以防彼終身警夫後世馳心  
於見善之末託意於思賢之際星霜不駐俄符大衍之  
籌容貌初移忽及始衰之歲况復日月逾邁春秋載新  
懼有乖於君子恐時同於小人前違而欲改安得後患  
而將遷有因百行惟脩宛見日新其德三緘乍啓可明  
言出於身自是一悔幽微全忘矯假方同知過之士亡  
一作異惡強之者朝來暮往故無得而踰焉亂世危邦  
則可卷而懷也窮其過兮嗟嗟莫追考其數一作兮七  
年



七惟奇豈因利而有改雖委骨而無移異買臣官達之  
期未然而覺契孔氏命窮之日既至而知由是三省為  
人勞謙自責駟馬將追而莫遂中心欲悔而何益永示  
千載非唯半百故余當弱冠之年已知非於曩昔

謙賦

以滿招損謙  
受益為韻

鑒天道之惡盈將守之以持滿窮易象之明義排溢美  
於虛誕鑒其體而如卑明其訓而非緩惟德之柄惟行  
之管是以賢人君子雖百代而同光聖帝明王歷萬古

而相纂然則謙之為義與讓同標苟不由於斯理必災禍而自招是以道映三皇明揚側陋智周萬物詢於芻蕘且聖賢而自貶何凡庶而可驕豈不思行高則憂毀於衆木秀則懼摧於颶矧夫陽光正中映土圭而將轉陰靈纔滿隨冀莢以旋銷是故君子觀之以為立身之本名彌彰而彌懼功彌高而彌損不耀彼而自上不明我而自混徒觀其退藏好閉養智於恬幽而坦坦卑以謙謙一辭而行將耻於躁三揖而進何有於嫌况乎海

以卑廣居深山以鎮靜可久楚莊懼功茂而終吉晉文  
耻戰克以無咎嗟凡今誇彼而競進何不覩斯而自守  
徒欲毀信廢忠謀訐自醜想進德之明義豈見充於虛  
受曷如君子稱物平施不生頗僻多者用謙為裒少者  
用謙為益不求翰音以待問必復厚德以珍席儻不伐  
之可嘉庶無媒以託跡

謙受益賦

以君子立身謙  
德之柄為韻

吳連叔

執勞謙者可以為天下君習撝謙者可以為天下勲在

易也有自牧之義於書也有受益之文行已立身而道  
自著御人率衆而德有云在上則騰茂實居下則播令  
聞亦足以化乎四表而行乎三軍若乃天地之義鬼神  
之理或禍其滿盈或福其廉耻故執羔鴈而行者得之  
而益貴秉耒耜之列者得之而易使在臣下之尚然况  
繼天而為子是以敷之而化行執之而教立被車書之  
所至霑雨露之所及故能邇無不洽遠無不賓豈不以  
言出乎口行發乎身求之於已加之於人者也夫心者

難備物者難兼故先王所以戒慎往哲所以崇謙不然者宣子何以稱賢太伯何以為德書三讓之策文作千古之程式其執謙也必在乎合宜其在卑也亦存乎隨時過之者俯而就矣不至者跂而及之無貽誚於巽牀之義無見刺於相鼠之詩惟木兮從繩則正惟后兮從謙則聖雖不富以其鄰而有助於為政理於身也合仁義之五常理於國也一作則文武之二柄宜播美於筆端傳謙德之雅詠

第二

同前韻

孟朝

求百行之規矩考三才於典墳歎撫謙之上德出雅誥  
之明文天得之而配地臣得之而輔君昭明茂緒啟迪  
洪勳匪招益而日益不求聞而自聞謙之伊何慎爾攸  
止益之伊何介爾蕃祉謙持益兮為輔為車益賴謙兮  
成綱成紀在寵思辱居終慮始昧之者所謂儉人行之  
者是稱君子其在炎漢英髦盛集京房辭榮疏廣搗挹  
挂衣冠以長往辭闕廷而不入棄人間而遠遊顧君恩

而尚及斯謙德之尤著軼羣賢而獨立降及南山綺季  
谷口子真逃居避竄遠害全身既逍遙以齊物獨放曠  
以懷一作為仁斯受益之為用在有聞而足珍固知將欲

求益莫如好謙覽孫弘之為歲滿而恐撲觀周廟之作  
誠其難更添若露才而揚已寧韜光而自潛勿謂天蓋  
高其道正直勿謂神無形恒處幽默既惡盈而惡滿斯  
好謙而好德同形影之相隨在毫釐而靡忒既警言既戒  
念茲在茲慮日月之逝矣當寤寐而求之凡曰儒行如

何勿思于嗟謙兮惟道之性能執一以無捨一作私在神

明而輔正惟觀鉛素希易象之一謙仰望銓衡歌周官  
之八柄

文苑英華卷九十三



欽定四庫全書

文苑英華卷九十四

宋 李昉等 編

人事五

人不易知賦一首

君子不器賦一首

人鏡賦一首

心鏡賦一首

至人用心若鏡賦一首 至人心鏡賦一首

以賢為寶賦一首 行不由徑賦一首

同人于野賦一首 得意忘言賦一首

人不易知賦

以題為韻

郭適

總目作鄭適

墳素通旨古今彛倫惟冲虛以效迹貴特達而知人有

藏器在我有從方立身歷九徵而觀則甄一德而求真

既而糺合性情交驅馳驟

一作勝負

莊列談其險艱堯舜病

其授受玉石相蔽悲獻璞之匪工媒介未孚忌投珠而

自久考聲度之軌躅察言貌之休咎鑒之則理將斯契

昧之則亂何不有彼經緯之區分在昭擇於能否復覽

前志清通不易或失子羽之容或失宰我之議自非識

周郎之顧曲辨齊竽之濫吹安能取士於飯牛之時拔  
才於卧龍之器其道或如蘭芷應以塤箎聞撤俎而興  
歎指負甑而留規管仲霸齊終慟哭於鮑叔國僑相鄭  
始登舉於子皮此則秦鏡一覽而皆得何必豫章七年  
而見知別有事業後時徘徊中路厭東郭之雪隱南山  
之霧猶恐相士者失之於下流披文者棄之於異處一作  
趣苟名實之斯在願曲直而咸喻徒叩寂於不材實有  
慚於能賦

君子不器賦

以用之則行無施不可為韻

白居易

君子哉道本性

一作生

知德惟天縱抱乎不器之器成乎

有用之用不器者通理而黃中有用者致遠而任重蓋

一有由字

識包權變理蘊通明業非學致器異琢成審其時

有道舒而無道卷慎其德舍之藏而用之行語其小能

立誠以脩詞論其大能救物以

一作而

濟時以之理心則

一身獨善以之從政則庶績咸熙既居家而必達亦在

邦而允釐彼子貢雖賢唯稱瑚璉之器彥輔信美空標

水鏡之姿是故

一作謂

非求備者又何足以知

一作多

之豈

如我順乎通塞合

一作舍

乎語默何用不臧何嚮不克施

之乃伊呂事業蓄之乃

一作則

莊老道德雖應物而不滯

終飭躬而有則若止水之在器因器圓方

一作任器方圓

如良

工之用材隨材曲直原夫根淳精於妙有宅元和於虛

受內弘道以

一作而

惟新外濟用而可久鄙斗筭之奚筭

一作算

諒

一作哂

挈瓶之固守何器量之差殊在性情之能

否豈不以神為玄樞智為心符全其神則為而勿有虛

其心則用當其無故動與神

一作時

合靜與道俱時或用

之必開滅武之智道不行也則守甯子之愚至乎哉冥

心在

一作無

我無可而無不可應用不疲無為而無不為

信大成而大受非小慧而小知顧庶類曲從則輪轅適  
用若一隅偏執則鑿柄難施是以易尚隨時禮貴從宜

展矣

二字一作盛矣哉

君子斯焉取斯

人鏡賦

以主聖臣忠道光貞觀為韻

金為鏡兮其鑒則明人為鏡兮其象則精彼有取其昭

燭我方致乎和平廣霽而磨龍既至酌獻而邦家以貞

懸於心則四聽

一作聽

常朗寘於握而萬方不傾惟賢任

賢自聖傳聖守之則通幽洞冥執之乃窮理盡性致和

樂功逾止水之平徵古今道光仁壽之鏡比璿樞以潛

運挂靈臺而韜映是委照以無疲每含光而不競無鑿

於水自視於人曷容華之自飾惟道德之所親鎔範義

陳協於君臣

八字一作功匪勤於鎔範義將協於君臣

斯乃至寶載光皇道

辨物數之紛紛洞晦冥之杲杲放之可包乎海嶽卷之

可盈乎懷抱煥乎發蒙皎若晴空光甚鑒兮塵不能翳  
德若容兮物莫能克以是為臣則獻可替否以是為鏡  
則進思盡忠斯為理兮化洽斯為鏡兮照窮惟賢聖之  
光贊含英華而不散執一法而不回仰千齡而殊觀貞  
明而翹楚角逐皎潔而羣邪冰泮茲鏡也克念則正罔  
念則荒播無疆以垂範披六幽而散光燭明明而洞洞  
歷久而煌煌聖作物覩鏡清寰宇驗成敗之原知榮  
辱之主我鏡在德曾無盤龍之雕我鏡在心自有山雞



之舞若然則皇唐邁德於陶唐吾君齊聖於文祖

心鏡賦

楊慎虛

嘗觀夫乾位始造坤儀廣生運元和而產氣因自有而  
含精萬靈羣分立圓形以標貴四體成物包寸心而致  
亨含妙有而存象賁虛無而自明故其端以居中動不  
違正藏牝谷而為主闢靈臺而作鏡將贖之而不昏因  
澄之而彌靜既刻邪而窒慾忽窮理而知命然後和精  
神明情性俾存存而不惑恒皎皎而孤映由觸類而感

有為必因象物知器乘時利人敷禮經以導俗馳精義  
以入神探禍福而知運任行藏而理身所以君子處順  
而情逸明王不言而化淳若乃潛英議蓄明斷欲鴻蒙  
而未析勿冒昧而相亂凝至精而一臨俾羣疑而四散  
故使立身者潔之而清真自守入官者朗之而美化攸  
贊語衆妙之玄通分萬殊於大觀然則物以心鑒心由  
物遷掇輕花而意艷坐孤石而情堅所以去彼取此削  
觚為圓將欲保至和而不撓存大朴而自然茲會有體

彼管攸設選賢而官知人則哲端靈心之朗暢拂清鏡  
之光潔取捨妙諧於物宜推擇靡遺於井渫遣許郭而  
齊鑿與山盧而比傑可謂張英風著徽烈嗟小子之庸  
蔽撫蓬心而望絕

至人用心若鏡賦

以方寸虛地有  
來斯應為韻

紇干俞

曠理心之至者有明鏡而比諸皎然可鑒泊然其虛捨  
將迎之載勤無情是得存好惡之不辨何狀不儲彼誠  
之明惟道斯守居中自執于精一待物豈殊乎先後云

誰鑒矣則用當其無匪我功焉乃為而不有淵兮內照  
曠若虛受伊默慮其智愚儼分形於美醜稽至理也其  
性命哉瑩爾蒙蔽滌乎氛埃引曜弘納清明洞開自外  
爰依叶彼生而有象由衷必應體夫神以知來故得稱  
有別於宏規等無私於衆類苟觀過之能審爰見疵而  
不愧始求義於昭昭卒窮微於至至和平自保非險乎  
山川容貌既呈必肖乎天地美夫鑒乃不臧勝而無傷  
恒其德匪明而匪晦

一作而匪  
韜匪晦

狀於物或圓而或方仰

周文之翼翼同叔度之汪汪是知弘量資乎日宣儲精  
本於明證鏡將心而共理影與形而合應思負局之克  
脩並懸心而有稱感物攸在立誠取斯彼範金之遺制  
信靈府以一作相隨吾道方存庶一觀而無替其明固  
久亦屢照而忘疲想夫朗若爰啟靜而無悶比申監於  
盈尺願脩容於進寸樂廣播披雲之詞莊生諧止水之  
論冀因照以玄鑒豈逢時而在困

至人心鏡賦

以人心融道清  
鑒應物為韻

于可封

莊生有言曰至人用心若鏡

一作至人之用心  
若鏡盖用全句

有旨哉

是言也夫鏡也者以明為體是故有來而必應心也者以淨為照亦可不思而玄通拂拭生光掛新臺而月滿象罔求得映赤水而珠融若鍊心而比鏡信清明而在躬爾乃以鏡為心因心載考菱花發而羣象生靈府開而萬物保斯鏡之精明謂人心得道至人所以卑其性而遺箴弱其志以虛襟聽無聲之和樂天籟之音明白四達照幽燭深希洞視而玄鑒在無心而用心苟能忘

已作虛舟之泛必保其光得秦鏡之鑒我邦君皇宗之  
子天人之英體以合道沖融混成其用心也達至人之  
妙理其朗鑒也同水鏡之澄清開意而圓照吐心而自  
明妍嗤莫能藏其象鬼神莫以遁其情絕母意與母我  
固不將而不迎懸彼高鑒求乎有貞覩處子兮調脂粉  
爭捧心兮效蹙頰醜者自醜新者自新形美惡而區別  
吾何情於知人醜一作媿匪桃夭寧容比證對香奩而呈  
貌慮柔姿而不稱有待良人非徒好勝因茲佇賞必冀

象應紅粉蛾

一作

眉趨而競謁宛其素質統

疑作

彼玄

髮類芙蓉之映水若姮娥之向月大明無私衆鑒不欺

光之所燭照及微物度

疑作

有假於思

一作

輝幸留心

於剪拂

以賢為寶賦

以勗名霸道邦家之託為韻

謝

觀

楚國之君賢人為寶彼則貴於無脛此為尊於有道琢磨仁義而不緇不磷淬礪鋒鉞而既堅既好皎皎神爽稜稜貌清志一潔而靡垢行百鍊而逾精非暗投以取



謂不韞積以沽名廉謹

一作讓

在心命爵而蔑聞銅臭文

章滿腹擲地而自有金聲洞徹不欺光芒相燭砥名而  
可尚礪節而自昂吐清詞之粲粲心水含珠見正色之  
溫溫情田積玉言錯落而無玷性真明而不瑕袖懷荆  
璞握有靈虵以鑒姦察邪之煥爛比照乘映廡之光華  
足可克盈軍國輝耀邦家何必積滿堂以遞矜易連城  
而助詐一非克儉之教一損不貪之化虞君受垂棘而  
滅齊國得孫生

二字疑

而霸徒美其色映層闕光能耀夜

殊不知寸陰踰尺璧之珍一經奪滿籛之價所以愛茲  
被褐重彼迷邦以清德之惟一奚白璧之能雙况各藏  
器俟時見機而作直若弦矢穎如鋒鍔誠席珍之可任  
以柱石之有託以之一作此綏撫而上下康寧以之守禦

而內外胥樂既三復之可驗奚衆口之能鑠則知金玉  
為寶者德義之衰賢人為寶者邦家之基國無日而無  
事賢無代而無之如此則何必楚也獨二三子之可師

行不由徑賦

以處心行道有  
如此焉為韻

浩虛舟

澹臺滅明幽棲武城感朴直之風散惡姦邪之徑生苟  
正其身寧偏僻而是履不以其道故斯湏而不行想乎  
塵滿荆扉草迷荒墅追遊不慎其經歷咫尺固難於出  
處鍾山石上杖藜之意殊乖蔣氏庭中携手之期頓阻  
牢落幽居交從日踈顧履危之若是將苟且其焉如訪  
野徑以閒遊恐穿松竹出衡門而獨步不遶園廬嘉矣  
礪志草茅規行畎畝避幽隱以不到視崎嶇而何有蕪  
城獨賞寧遊舊井之間山館時歸肯逐樵人之後至若

草樹沉沉幽芳阻尋絡野之茅陰自合緣溪之苔色空  
深以遨以遊見徇公滅私之志一動一息有去邪崇正  
之心是以蕭索鄉閭虛閒襟抱優遊多轍之窮巷來往  
疎槐之古道花間絕跡念蹊樹之徒芳原上無人惜臯  
蘭之暗老且遵道如砥持心若弦信無私以白首將抱  
直以窮年顏生附郭之田有時窺矣謝氏登山之屐無  
所用焉既而披蔓草之荒涼見遊人之邈迤方檢身於  
邪正寧繫懷於遠邇楊朱悲道喪事亦如斯阮籍哭途

窮意殊若此當舉直以錯枉冀風行而草靡苟非賢智之為心孰能如是

同人于野賦

以君子之道何往不通為韻

周 鍼

善本身脩名由道長惟君子之所履遇同人而遂往不脩正直誠邪枉於出門既叶於心視野郊於指掌守柔以處亦何後而何先秉健而行諒無偏而無黨盖以居謙不躁應上潛通欲垂文於天下須立志於胸中雲合霧開孰無機於豹變聲馳響答比有意於雷同必使

量統含弘義資探討包利貞而共濟顧言行而相保情  
田波注將符若水之時德宇馨香用法如蘭之道乃言  
六二是乘柔之主九五為行健之資乘乎柔而何剛敢  
奪行乎健而何往不之况能辨方知類視險如夷念同  
氣以遵彼實忘言而在茲予以審吉凶較能否始居中  
而體正終處上而為首理方求友喻伐木以攸宜義在  
同心於斷金而誰有所期利比浮雲悠然莫分光於身  
者曰道聲于教者曰文故得退無失位進得其羣將果

行以育德候移忠而事君則知福應無他元亨由已理  
契和順心惟知止不然何以風雲偶會咸為得路之人  
悔吝不生盡似同舟之子別有勵志彌久勞謙已多既考  
之於六位亦化之於四科且如今日之進也道如之何

得意忘言賦

以去象棄詞根  
乎幽朕為韻

謝觀

易意難見言以存之得意之後而言可遺本憑詮以指  
昧既達誠而去詞昔者先王玄通默想以深指難可擬  
議嗟後世無不一作瞻仰是以錯綜六爻森羅萬象立

文以寓其吉凶賾隱以知其來往憑有狀之狀而定其  
範圍因可名之名以徵其影響悟影響則可名之名息  
達範圍則有狀之狀無執可名為常名者謬定有狀為  
常狀者愚方知禮以適變作事之符符以觀設遵意之  
樞但魚兔之得也於筌蹄而已乎然則言者意之苗得  
意一作苗而根源有據意者言之本得本而枝葉不御假  
以寄誠明為定據如鑽燧求火獲火而燧之可忘似剖  
蚌求珠得珠而蚌之可去於戲置文字之館植玄牝之



根自入存存之室廢乎察察之門不爽毫釐經濟無為  
之內匪差黍累彌綸有截之垠既而搜未形之形索無  
朕之朕變以喻而立幽藉明為準則可棄喻取變即明  
討幽不可以理縛難可以文囚遇陽則明豈必離乃為  
日遇陰則順何須坤乃為牛夫如是稽其意窮其事旁  
通其閭域曲盡其精義英華可採桎梏斯棄儻究忘言  
之機庶叶表微之思

文苑英華卷九十四

欽定四庫全書

文苑英華卷九十五

宋 李昉等 編

人事六

夢遠遊賦一首

夢遊仙庭賦一首

夢賦一首

夢五色筆賦一首

夢捧日賦一首

高宗夢得說賦一首

莊周夢為蝴蝶賦一首

莊周夢蝴蝶賦一首

夢舞鍾馗賦一首

夢遠遊賦

并序

獨孤及

老氏稱吾所以

一有  
有字

大患者為吾有身大哉聖人之知

微乎

一有  
夫字

生者一氣之暫聚耳有天地之和自然之力

以運其行止節其天壽非智力之所

一有  
能字

扶明矣而舉

世矻矻莫不保持形骸謂為已有特執迷妄往而不返

小者攘禮樂竊忠信以賈譽大者盜天地之權至於忘

身道德之衰皆此物也予生於浮而長於妄汨沒當世

與羣動俱不智不能逃形於聲名之韁鑣脫屣於冠冕

之籠檻及其世界顛倒萬物反覆始反照收視以觀身

世然後知一生之患假合真

合真字一  
作豈直

芻狗土梗

一作  
直

熱燄聚沫而已則我之身與百憂偕長况重險之中乎  
思欲冲三清出五濁乘陵虛極與造物者為伍莫有由  
矣嘗中夜夢飛昇太空若有以名跡見誚者覺而自失

乃為賦以狀遠遊且旌吾聞

二字一  
作吾

道之晚也其詞云

仰太素兮觀元精烟煨孰官司乎物初

一作  
物物

兮得流形

一有  
而字為人太皞遺我八卦藏天地於文字黼而黻之為

聖為智褒衣之徒相與擊建鼓

一有而字

揭日月兮奔孝慈

而走仁義而

一作其

弊也古是而今非身賤而名貴驂驪

馭逖兮道路屯雲而奔波絢煥鞅轡兮玉帛鐘鼓之駢

羅霍爓鬱密兮心懸天地而火馳蒼黃

一有今字

得未終也

而失

一有已字

繼之百骸與日月並馳

一作走

五藏與哀樂交戰

義和未

一有及字

弭轡榮枯紛

一有而字

萬變何生涯

一有之字

佗倅

兮蹇吾降此中州馮世道以上下若涉水而無津兮與

吹萬同其波流况世緒塊北兮如棼絲之相繆

一作膠

見

辰極之低昂兮知杞人之殷憂顧兔呀以蝕月兮天地

閉而雲愁鳳凰焚其故巢兮遶舊國以失儔埃塏堦以

上薄兮虞

一有羅字

紛其四州吾始未知

一有大字

六合湫隘之

若此孰與居

一作吾

兮遠遊豈無太清之路兮夫何漫漫

而迢遞望帝鄉而

一作之

低徊兮微白雲與之皆

一作皆

逝

澄予神於遙夜與顥氣期乎無垠真境沕穆以傍感精

誠薰然而來親歛乘夢以奮飛搏至虛

一作靈

以上賓望

見碧落天地如掌洞開八門別有萬象亭亭物外乘化

直上身世雙遺獨與道徃其徃也泛兮若遊魚振鱗而  
泳清川回兮若翔鴈得順風而緣秋天忽不知予誰之

身夫何為者深

一作探

入空界七耀在下問予津於混茫

兮蹇徜徉以延佇若有人兮縹緲指人間以唁予曰鳳  
兮鳳兮何德之睽天固桎若以禮義桎若以事機蓋支

離其德而逃

一作起

乎物累使逸翮可得而籠樊兮孰云

夫五色

五色二字一作五毛

之自異天運地載剛柔生焉千變萬

化如環無端彼興廢與徃復同大壑之波瀾將令歸根



明徵其源則吾與若一有皆字幻也又奚睢盱於其間幻未

始有封物未始有疆成則虧進則傷無汨而和無易而

方山立其中央善汝行密汝藏道將自光吾在大羅之

上玄都之所乾坤為家日月為宇噓吸元氣太虛之下

戶音尚一乃心勿謂道阻遊乎無窮吾顧見汝奉真誥以

自省兮五情愁其增熱哀攀龍之無階兮思遇一作天

之曷月未知去下方幾萬億兮退將返遵吾歸轍循玉

虛以下降濟銀河以中歇馮東井以俯視識故國之城

闕千門萬戶遙如蟻穴百川綺分五嶽羅列覓舊山與

喬木纔依稀而明滅見伊川之一無之字大道鞠為戎狄歷

陽故人半作魚龜一作曩之奔命於市朝者如紛紜飛

馳譟譟蚩蚩蹙躡躡肖翹陸離若蟻虱之聚壞絮蚶

蛛之乘遊絲一有吾字乃命今日識羣動之變態兮莞然倚

長空而笑之亦既自得周覽未畢惕然形開萬象都一作

如失羣有儼以皆作百慮續其來歸乃夙昔之人寰如

故時之喧卑向之俯仰欣戚無非妄者然後知吾之生

也與妄皆生邪氣乘之萬緣合并為憂為患為虧為盈

彼君子兮

一作方

碌碌自然以為覺猶飾妄以賈名安知

聖人不以世界為重狴生死為大夢視變化以

一作與品

類亦由

一作猶

神交之飛動與貴

一作遺

物以顧身兮悟生

浮而質陋以一氣之秒忽與萬化而紛糅自視俄然寄

形宇宙尚何能濡首於榮辱之境甘口

一作心

於哀樂之

囿鷦鷯于飛載翩載翾

一作翻

君子至止棲息化元獨立

載

一作乾又作道

樞怡神胚渾萬物轉薄吾真長存止水不波

浮雲無根與時盈虛委質乾坤倚伏相軋吉凶同源物  
各自爾予欲無言優哉游哉聊以窮年

夢遊仙庭賦

王延齡

葛稚川見素抱朴傲世忘榮循潔白之道吸元和之精  
泊乎意朕飄然體清於時秋風蕭蕭秋夕凜凜野猿垂  
幕山童薦枕湏臾之間乃安斯寢神倏忽而逾邁眇不  
知其所屆紛溶溶而上馳將若遊乎天外駕白鹿駢  
麟飛翠蓋騰紅輪橫絕南斗超凌北垠出崑虛以騁志

過滄溟而問津呵風伯叱雷父披天門謁天宇太一之  
居兮金碧堂洞鬱密兮不見陽藜珠履地雲屏匝廊色  
剌剌其揚彩爛煜煜以成章旖旌旌節袿襪羽裳蒼龍  
吹麓丹鳳為舞洞轆轤乎東廂此其大較也若乃羣仙  
之所盤薄珠庭之所獲護曼以玉堂映以朱閣靈怪潛  
秘光華相錯陰陽不能授其寒暑造化不能生其美惡  
及乎上真降命赤書爰作速陽侯而波靜走姮娥而月  
落值江妃之倩練驚海童之閃爍其翱翔曠遠者嬉九

垓排三山紫烟生白雲閒偃蹇夭矯翩綿縹緲可見而不可攀至夫靈草自然珍木不死餐霞嚙液乘鴻躡鯉或隱山林或遊城市斯實玄都之能事尤難測其云已洪崖先生方睥其容頷其頤曰中州之士也爾來何遲出秘訣約真期挹華池之水唱天闕之詞既乃避席屏氣拜命之辱精皦晶兮從空浮長覺悟兮還舊丘唯見塵書滿屋皓月生樓涉化窮極無跡難求豈莊周夢為蝴蝶蝴蝶夢為莊周歟意者天聰明神正直親其貞亮

之槩照以玄魁之極雙童兮何日再逢上清兮何時再  
陟掩空館而愁卧撫長懷而歎息

夢賦

杜 頤

夫人者何乾坤之至精夫夢者何精爽之所成及乎羣  
動息閒守一作清澹爾安寢儼乎無營亦或不意而得

亦或因感而生明休咎之先兆通喜怒之深情其為吉

也懸三刀以作郡凌八門而上征或生松以表秩或贈

蘭以為名監音腦審其戰勝鑿心啟其才英其為凶也

晉侯彌留作疾於二豎孔公將歿觀奠於兩楹雖否臧  
之殊感諒希微之難明是以太古無夢以絕欲聖人肇

夢以治想隨事而生觸類而長或含悲以憎暢一作暢或

當歡而契賞曾有慕而忽來屬所思而必往雖遼萬里

遽諧疇昔之遊縱冥九泉亦覩平生之像鬼出神入惟

惚惟恍則有睽聞疑作問庭闈烟霜歲暮疑常馳戀於定

省忽飛魂於寐寤撩軒幌而無隔邈山河之徑度常倏

忽而往來竟不由於道路獨有遭遇明時羈遊上國才



譽不振命途仍塞仰軒后之通感慕殷宗而見刻當捧  
日而振披一作披誠庶明君之夢得

夢五色筆賦

夫何言吉夢兮杳杳冥冥若有一人兮遺我鴻筆居然  
五色兮其狀炳靈煥錯彩於無像紛斑斕而有形匪沉  
淪於畫一作畫墨那渾濁於殺青獲乎希微來何處所彩  
非染而自備管在搦而神與意藻思之相授期文章而  
見許信魂夢之有乎曾目成而不阻神之正直福非回

邪何代無才曷江淹之允屬則吾豈敢疇郭璞之孔嘉  
繫有靈兮未悟儻知夢兮增華始其良夜幽閒齋心朗  
暢寢彌安於自得思不適於無妄故降綵筆冥微疑玄  
貺與蠅集而殊端方兔毫而詭狀丹翠式序玄黃可分  
叅乎素色爛以成文若以我脩詞五彩必能吐鳳若以  
我揮翰一飛何謝慶雲是知物有幽通神為真宰夢於  
掌握驚茲夕以靈奇瞻彼筆端勝常時之光彩誠有志  
而必達宜飾躬而不殆展轉虛室瞳矐曉日目眩昧於

花容想綢繆於錦質或乍進而乍退類若虛而若實既而駭人恍然觀身雖放言之在我豈假手而非神則知五色之靈筆善誘斯文之日新

亭捧日賦

以神遇釋燭兆發嘉祥為韻

蔣防

靈降嘉亭天垂至陽誠發身之兆朕符翊聖之禎祥所謂神而遇闇而彰息沖澹之居于于而自得見貞明之質曖曖而彌光倏爾疑升瞰兮下燭瞳矐甘寢之所恍惚曾泉之曲撫金烏之翼匪隔雲霄駐羲和之車乍迴

昏旭想夫卑高莫隣授受何因忽煌煌而委照值默默而凝神寂其神乃無間而通碧落上其手自有昊而得紅輪縹緲塊交光芒景附肘腋輝爍襟懷煦嫗類銜規於遠山同抱壁於中路在忘形之際用示無私當向晦之時將祛未寤豈不以精誠可託光陰可駐從九霄之降祉表千載之嘉遇者也故曰道契幽微天且不違躬嚮陰隲指掌陽輝載營魄而虛無默住荷靈貺而照燭潛依至若冥蒙上越埃壘中歇始悠悠以神契俄赫赫

而明發驗扶桑之際其徃阻脩偶支枕之時其來倏忽  
是知天無親降靈而非遐神不昧獨幽而不賒不然何  
虛徐衽席承奉光華高眠而不驚不悚見瑞而可仰可  
嘉然則荀令之談足徵程昱之榮有非常眷眷於天路  
每拳拳於雲表周旋寤寐偃仰昏曉庶照臨之理感通  
知葵藿之誠不小

高宗夢得說賦

以恭默思道帝  
養良弼為韻

李觀

殷之哲王唯政是恤夜分而寢夢獲良弼雖神悸而若

驚異形求而勿失爰微營匠刻乎獨見之真乃俾庶僚  
訪其唯似之質當厥夢也神馳無方未訖永夕如躋彼  
蒼悅其神兮以浮偃其體兮若亡形接乃夢斯人甚良  
側身徘徊於己之傍將舉趾以趨附又伸眉而抑揚言  
霏霏而無瑕目矐矐而有光觀其儀可用為列辟之式  
察其志不獨稱百夫之防升降咸若周旋允臧寂乎昭  
昭既寢不忘斯后克明承天之賚謂濟川之噐而投足  
不濡履大覺之端

莊子有大覺而後  
知此其大夢也

而遊夢無閱其中

蕩蕩其表曖曖雖用助理於一人實候清平於千載於  
是武丁夢於宮而上與天通傳說築於外而中合神契  
持緡向老諒殊渭水之涯負畚將疲久困傳巖之際說  
匪丁而空山長徃丁匪說而大位斯替如魚水之相因  
保君臣之雙麗惟說也策名歸主惟丁也受命於帝帝  
何言哉邈以玄造陰推吉士以佐有道說之居兮山之  
幽雲叢叢兮水浩浩彼人兮何斯歟中心兮夢之如渴  
兮在茲如饑兮在茲

一作如渴兮如  
飢在茲兮匪茲想遺眷以索隱撫

空懷而嘆思思之未得端宸沉默其夢也則誠其寤也  
則惑其収之於野而寄之以國有唐時雍上明下恭君  
與之同日臣與之比蹤事不惟舊今之斯從斐而成章  
有媿雕龍

莊周夢為蝴蝶賦

以昔者莊周夢  
為蝴蝶為韻

賈餗

窮萬化之指歸得七篇於往昔何真人之形氣以異類  
而遷易將以明道之樞喻心之適徐徐在寐忽羽化於  
他方栩栩既遊忘魂交於此夕是知溥天之下萬物一



也雖飛走之或殊何生成之為假形隨夢改豈必大人  
占之心與物遷孰云夫子聖者澹然休息悅爾飛揚閭  
出蠨蛸之戶潛辭蟋蟀之堂風景熙熙但娛情於蝴蝶  
是非草草已委蛻於蒙莊既而忽忽悠悠東西泛浮動  
皆造適止必忘憂草上翩翩與百花而共媚林間搖曳  
似一葉之先秋彼賢愚波注禍福環周信乃人間之累  
非同域外之遊且夫浩浩陰陽茫茫羣衆紛習襟之憂  
患勞日夜而迎送是以至人因茲託諷為魚而江湖可

入為鳥而風雲可控飄然而往安知棄我如遺條爾復來又疑與爾俱夢故得弔詭之理

出莊子

明懸解之規方

形神之寂寞有變化之云為夢也者不期而會飛也者以息相吹豈銜髮之能診蓋忘蹄之可知至于徃復湏臾與化為徒寤與覺而未辨蝶將周而已殊是以大同而言萬物為肝為膽小異而說一身為越為胡苟愚智而自得實聖靈之軌模客有志業未如居多不愜六夢紛其夜動七情忘於晝接乃陳古以况今賦莊周之夢

蝶

莊周夢蝴蝶賦

以題  
為韻

張隨

伊漆園之傲吏談玄默以和光表人生之自得緊萬化  
之可量萬靈齊乎一指異術昭乎通莊忘言息躬輒造  
逍遙之境靜寐成夢旋臻罔象之鄉於以遷神於以化  
蝶樂彼形之蠢類忘我目之交睫於是飄粉羽揚翠鬣  
始飛飛而稍進俄栩栩而自愜烟中蕩漾媚春景之殘  
花林際徘徊舞秋風之一葉於戲變化悠悠人生若浮

希微兮其狀方異恍惚兮其神遂收雖遠遠而復體尚  
悄悄以在眸我豈彼類彼寧我儔苟夢非而覺是誠虛  
徃而實留且玄蹤莫覲真理難求莊周之夢蝶而蝴蝶  
之夢周歟迺知元氣混然感通斯衆為生死之異分量  
寤寐而適中形因靜息符大辨之不言神以化遷異至  
人之無夢若夫氣為質本夢與道俱以我之有化彼之  
無固假寐而倏忽越百靈疑作以湏臾其在周也不知  
蝶之於彼矣其在蝶也不知周之於此乎若然者萬物

各得其性一體或殊其途有徐徐而龜曳其尾有察察而狼跋其胡智者所以自智愚者所以自愚則孰能問其巨細孰能別其榮枯欲窮莊生夢蝶之理走將一問於洪鑪

夢舞鍾馗賦

以德至前王始觀神跡為韻

周繇

皇躬抱疾佳夢通神見番綽兮上言丹陛引鍾馗兮來舞華茵寢酣方悅於宸扆不知為異覺後全銷於美疢始訝非真開元中撫念齊民憂勤萬國萬幾親決於宸

斷微瘧遂沾於聖德金丹術士殊乖九轉之功桐錄醫  
師又寡十全之力爰感神物來康哲王於時漏滴長樂  
鐘敲建章扃禁闥兮閑羽衛虛寢殿兮閨嬪媵虎魄枕  
欹象榻透熒熒之影緜鬚簾卷魚燈搖閃閃之光聖魂  
惝恍以方寐怪狀朦朧而遽至磳硃疑作硃標衆纒類特  
異奮長鬣於閭臆斜領全開搔短髮於圓顛危冠欲墜  
顧視纔定趨蹌忽前不待乎調鳳管撥鸞絃曳藍衫而  
颺纚揮竹簡以蹠躑頓趾而虎跳幽谷昂頭而龍躍深

淵或呀口而揚音或蹲身而節拍震雕拱以將落躍瑤  
階而欲折萬靈沮氣以悼惶一鬼傍隨而奮躑烟雲忽  
起難留舞罷之姿雨電交馳旋失去來之跡睿想纔寤  
清宵已闌祛沉痾而頓愈瘁山錦切  
寒也御體以猶寒對真  
妃言寤寐之祥六宮皆賀詔道子寫娑娑之狀百辟咸  
觀彼號伊祁亦名鬱壘儼祆於凝沍之末驅厲於發生  
之始豈如呈妙舞兮薦夢明君康寧兮福履

文苑英華卷九十五